



CAIC anjur kolokium memperkasa program pengajaran dan pembelajaran

Seramai 180 dalam kalangan tenaga akademik dan pensyarah dari Universiti Malaysia Pahang (UMP) dan institut pengajian tinggi hadir menyertai Kolokium Pengajaran dan Pembelajaran 2014 bertemakan 'Innovation Towards Creative Pedagogy' anjuran Pusat Inovasi dan Daya Saing Akademik (CAIC) universiti ini.

Program dirasmikan oleh Timbalan Naib Canselor (Akademik & Antarabangsa), Profesor Dato' Dr. Mortaza Mohamed bertempat di Dewan Astaka UMP. Hadir sama dalam program, Pengarah CAIC, Profesor Dr. Mohd Ridzuan Nordin dan Timbalan Pengarah CAIC, Dr. Zailin Shah Yusoff pada 9 April yang lalu.

Menurut Profesor Dato' Dr. Mortaza dalam ucapannya berkata, program ini merupakan platform terhadap para pendidik untuk berkongsi pengalaman dengan pendidik lain mengenai teknik mengajar yang lebih berkesan terutamanya di universiti ini.

Ujarnya, melalui perkongsian ilmu ini secara tidak langsung dapat menghasilkan graduan yang cemerlang melalui teknik pengajaran yang berkesan selain mengharapkan para pensyarah dapat menfokuskan sekurang-kurangnya 60 peratus kepada pengajaran dan pembelajaran manakala 40 peratus diberikan untuk tugasan penyelidikan.

"Pendidik seharusnya menerokai kaedah terkini dalam pengajaran dan pembelajaran termasuk persiapan berdepan dengan cabaran bidang teknologi maklumat (ICT)

untuk memastikan kaedah pengajaran dan pembelajaran ini terus diperkasa," katanya yang mengharapkan golongan pendidik menerokai kaedah-kaedah terkini termasuk e-Pembelajaran yang turut diperkenalkan di Malaysia.

Antara penceramah yang hadir berkongsi pengalaman adalah Pengarah Pusat Kecemerlangan Akademik dan Penasihatan Pelajar (DCAE) dari Universiti Sains Malaysia (USIM) iaitu Profesor Dr. Abd Karim Alias.

Beliau yang berkepakaran dalam bidang teknologi makanan banyak menggunakan internet sebagai medium alternatif dalam program pengajaran dan pembelajarannya. Profesor Dr. Abd Karim kini mengetuai pembangunan projek *Open Educational Resources* (OER) dan berjaya menghasilkan lebih 20 perisian berkaitan.

Antara pensyarah UMP yang turut sama hadir berkongsi kepakaran adalah Profesor Madya Ir. Adnan Zulkiple dari Fakulti Teknologi, Dr. Adzhar Kamaludin dari Fakulti Sistem Komputer & Kejuruteraan Perisian (FSKKP) dan pensyarah Pusat Bahasa Moden & Sains Kemanusiaan (PBMSK), Ahmad Irfan Ikmal Hisham serta Guru Bahasa, Marziah Ramli yang pernah menerima pengiktirafan Anugerah Akademik Universiti (AAU) atas pencapaian cemerlang dalam pengajaran dan pembelajaran.

Peserta yang merupakan pensyarah subjek Fizik dari Kolej Martikulasi Gambang, Nor Ezah Jamaluddin yang julung kali berpeluang menghadiri program ini

berkata, beliau lebih banyak mengetahui teknik pengajaran yang berkesan daripada pensyarah yang berpengalaman.

Beliau juga mengharapkan lebih banyak masa dapat diperuntukkan untuk program perkongsian ilmu ini dan antara yang menarik termasuklah penggunaan Web 2.0 dalam pengajaran yang dapat menarik minat pelajar untuk pengajaran yang lebih berkesan.

Program ini merupakan platform terhadap para pendidik untuk berkongsi pengalaman dengan pendidik lain mengenai teknik mengajar yang lebih berkesan terutamanya di universiti ini.